

# Chalenders

DAD AITA DERMONT

**T**schel di m'è vegnì per mauns in nov cudesch da scola ed en quel vegniva tractà tranter auter il chalender. I m'ha propi fascinà da leger quest'istorgia, co che l'uman ha – per vegnir maister cun il temp – cumenzà al divider en onns, mais, stagiuns, emnas dis, uras e.u.v. Andaments che sa chapeschan oz da sasez han duvrà a sias uras observaziuns ed enconuschientschas genialas.



**M**a sco quai che nus enconuschain ils umans hai er dà blearas discordias e quel connex. Las bunas enconuschientschas han adina stuì vegnir sancziunadas l'emprim da quellas persunas che avevan la pussanza ed inqualin che saveva memia bler è sa tschentà en praschun fin ch'il temp è stà madir resp. fin che las enconuschientschas han purtà in avantatg a quels che avevan la cumonda. Ma quai è in auter tema.

**B**asta, nus savain che dal temp dals Romans cumenzava l'onn a Chalandamarz. Insacura hani lura midà quai ed han fatg confusiun, tant che anc oz numnain nus il novavel mais da l'onn «set-tember», il dieschavel mais «oct-ober» e.u.v. Aja, ch'ins n'ha betg curregì quest sbagl! Co vul ins ussa declarar als uffants noss sistem da cifras e curreger lur quints.

**B**un, ozendi sa mintgin che la terra è radunda. Ins po declarar als uffants ch'entaifer in onn giria la terra ina giada enturn il sulegl e che quai haja l'effect da las stagiuns; che er la glina giria enturn la terra, e quai 12 giadas l'onn, ina giada al mais; ch'entaifer in di (ed ina notg) sa volvia la terra enturn sasezza e saja perquai durant il di en il cler dal

sulegl e la notg en il stgir.

**M**a pertge – pudes duman dar in uffant – han ins partì en il di en 24 uras empè d'en 100 parts. Las «uras» fissan lura simplamain pli curtas, v.d. il temp fiss tuttina, ma las uras midassan pli savens, numnadamain circa

mintga 15 min. E pertge betg gist er partir si quest temp d'ina «ura» en 10 parts?

**1** di avess 100 uras – 1 ura avess 10 minutas?

**N**us giessan a scola circa a las 30, gentassan a las 50, suenterschaina, a las 75, giessan nus lura plaunet enturn las 85 a durmir. «Ma quai è ussa halt simplamain uschia», di la magistra u il magister, «e vus avais d'emprender e basta.»

**E**quant ch'igl è d'emprender! Tut las enconuschientschas genialas ch'insatgi ha fatg avain nu be pli d'emprender or dad ora e remagliar e dai e dai. I vegn mesirà cun notas, scala 1 fin 6!

**M**agari faschess ins gugent er in pèr atgnas enconuschientschas, er sch'ellas n'èn betg genialas. Ma quai è pers temp. Nua fissan, sch'ins avess vulì spetgar che mintgin inventia sez la roda. I na tanscha betg da dar in'egliada si per il tschiel e dir: Igl è mezdi u da guardar per terra e dir: Igl è zercladur u igl è fanadur. Nus stuain vegnir vinavant, ans fidar da las enconuschientschas dals auters, stuain savair ed avair adina dapli ed adina pli spert e dai e dai ed il temp va ch'el sa coppa. Nua via?

**I**l proverb di: «Na far chalenders.»